



## RESOLUCIÓN POLA QUE SE AMPLÍA O PERÍODO DE EXTRACCIÓN DE SEMENTE DE MEXILLÓN EN BANCOS NATURAIS

### ANTECEDENTES

1. O 12.06.2023, a Federación de Asociaciones de Mejilloneros Arousa y Norte (FARN) presenta un escrito no cal solicita que se prorrogue o período de extracción de mexilla ata o 15.07.2023, debido ás dificultades para o abastecemento de mexilla pola falta de fixación de semente de mexillón nas cordas colectoras e a insuficiente cantidade recollida nos bancos naturais.
2. O 12.06.2023, FEMEX Federación de Asociacións de Mexilloeiros, presenta un escrito no que sinala a necesidade dunha batea para completar a recollida da cría, que esta situación de escaseza de mexilla se debe ás restricións impostas para a súa extracción e solicita a ampliación do período ata o 15.07.2023.
3. O 12.06.2023, a Asociación de Mexilloeiros da Illa de Arousa solicita a prórroga do prazo do período de extracción de semente de mexillón ata o 15 de xullo nos bancos naturais xa que os seus asociados aínda non dispoñen da cría necesaria para a campaña e as cordas colectoras en moitos polígonos non teñen presenza de mexilla.
4. O 13.06.2023, a Asociación de Mejilloneros Profesionales A' Marxa solicita a prórroga do prazo do período de extracción de semente de mexillón en rocha ata o 15 de xullo debido a que os seus asociados aínda non dispoñen da cría necesaria para abastecer as bateas e as cordas colectoras en moitos polígonos non teñen presenza de mexilla.
5. O 14.06.2023, a Asociación de Mexilloeiros Ventos da Ría-Vilaxoán presenta un escrito no que sinala que os seus membros aínda non puideron completar a recollida da cría e solicita a ampliación do período de extracción de semente de mexillón en bancos naturais ata o 15.07.2023.
6. O 21.04.2022 o director conservador do Parque Nacional Marítimo Terrestre das Illas Atlánticas de Galicia emite un informe desfavorable á ampliación do período de extracción de semente de mexillón fora do período comprendido entre o 1 de decembro e 30 de abril dentro do seu ámbito.



7. O 15.06.2023 emítense informe polo Director xeral de Pesca, Acuicultura e Innovación Tecnolóxica no que indica que non se atopa inconveniente en outorgar unha ampliación extraordinaria do período de extracción da semente de mexillón ata o 23.06.2023 cunha serie de condicións.

#### CONSIDERACIÓNS LEGAIS E TÉCNICAS

1. O Decreto 406/1996, do 7 de novembro, polo que se aproba o Regulamento de viveiros de cultivos mariños nas augas de Galicia, modificado polo Decreto 338/1999, do 3 de decembro, dispón que as condicións das habilitacións para o abastecemento de semente en banco natural, as zonas e períodos de extracción e as cantidades máximas a extraer en cada zona, se regularán mediante Orde da consellería competente en materia de acuicultura.

2. Por Orde do 26 de outubro do 2000 regúlase a extracción de semente de mexillón en bancos naturais, fixando no seu artigo 4 como período de extracción o comprendido entre o 1 de decembro e o 30 de abril. Así mesmo establécese a prohibición de extraer semente os sábados, domingos e festivos.

3. A Orde do 22 de decembro de 2021 pola que se aproban os plans de xestión para recursos específicos e algas en Galicia para o trienio 2022-2024, establece no seu artigo 2: *“Apróbanse os plans de xestión para o trienio 2022-2024 para a explotación sustentable do percebe, presentados polas entidades asociativas do sector, que se relacionan no cadro A. Os plans de xestión de percebe que inclúen zonas de reserva para a extracción da semente de mexillón e zonas de explotación exclusiva de percebe, e as coordenadas xeográficas das mesmas, se relacionan no cadro B.”*

4. Consonte co disposto no informe do Director xeral de Pesca, Acuicultura e Innovación Tecnolóxica, emitido o 15.06.2023, citado no antecedente sexto da presente resolución:

*“Establecerase na resolución, de xeito destacado, a limitación de zonas que se reflicte na Orde do 22 de decembro de 2021, pola que se aproban os plans de xestión para recursos específicos e algas en Galicia para o trienio 2022-2024, que establecen os plans de xestión de percebe que inclúen zonas de reserva para a extracción de semente de mexillón e zonas de explotación exclusiva de percebe, e as coordenadas xeográficas destas.”*



5. A Disposición Adicional da Orde do 26 de outubro do 2000 establece que en función das características conxunturais de cada campaña e cando o seguimento e avaliación dos recursos o aconselle, a xefatura territorial, dentro do ámbito da súa competencia, poderá modificar as zonas, cantidades e períodos de extracción mediante resolución motivada que deberá ser comunicada aos interesados. Respetarase en todo caso a prohibición de extraer semente de mexillón os sábados, domingos e festivos.

De acordo coa dita disposición esta xefatura territorial é competente para ditar esta resolución.

De acordo con todo o indicado, RESOLVO:

1. Ampliar, con carácter extraordinario, o período de extracción de semente de mexillón ata o 23 de xuño do 2023, entre as 7:00 e as 20:00 horas, en bancos naturais dentro do ámbito territorial desta xefatura, respectando as zonas de explotación exclusiva de percebe relacionadas no cadro B da Orde do 22 de decembro de 2021 pola que se aproban os plans de xestión para recursos específicos e algas en Galicia para o trienio 2022-2024, así como respectando a prohibición de extraer semente de mexillón os sábados, domingos e festivos.

2. Non autorizar a ampliación do período de extracción de semente de mexillón no ámbito do Parque Nacional Marítimo Terrestre das Illas Atlánticas de Galicia.

Contra esta resolución, que non pon fin á vía administrativa, poderase interpoñer recurso de alzada no prazo dun mes ante a conselleira do Mar, de conformidade co disposto nos artigos 121 e 122 da Lei 39/2015, do 1 de outubro, do procedemento administrativo común das administracións públicas.